

রেজিস্টার্ড নং ডি এ-১ “জাতির পিতা বঙ্গবন্ধু শেখ মুজিবুর রহমানের
জন্মশতবার্ষিকী উদ্‌যাপন সফল হোক”



বাংলাদেশ

গেজেট

অতিরিক্ত সংখ্যা

কর্তৃপক্ষ কর্তৃক প্রকাশিত

বুধবার, জুন ৩, ২০২০

[অর্থের বিনিময়ে জারীকৃত বিজ্ঞাপন ও নোটিশসমূহ]

গণপ্রজাতন্ত্রী বাংলাদেশ সরকার
বাংলাদেশ পুলিশ
পুলিশ হেডকোয়ার্টার্স
ঢাকা
প্রজ্ঞাপন

তারিখ : ২০ জ্যৈষ্ঠ, ১৪২৭ বঙ্গাব্দ/০৩ জুন, ২০২০ খ্রিষ্টাব্দ

এস. আর. ও. নং-১১৯-আইন/২০২০।—Police Act, 1861 (Act No. V of 1861)
এর section 12 এ প্রদত্ত ক্ষমতাবলে মহাপুলিশ পরিদর্শক, সরকারের অনুমোদনক্রমে, নিম্নরূপ
বিধিমালা প্রণয়ন করিলেন, যথা :—

১। শিরোনাম ও প্রয়োগ।—(১) এই বিধিমালা ট্যুরিস্ট পুলিশ বিধিমালা, ২০২০ নামে অভিহিত
হইবে।

(২) ইহা অবিলম্বে কার্যকর হইবে।

২। সংজ্ঞা।—(১) বিষয় বা প্রসঙ্গের পরিপন্থি কিছু না থাকিলে, এই বিধিমালায়—

(ক) “অধিক্ষেত্র” অর্থ বিধি ৬ এ উল্লিখিত ট্যুরিস্ট পুলিশ ইউনিটের অধিক্ষেত্র;

(খ) “ইউনিট প্রধান” অর্থ ট্যুরিস্ট পুলিশ ইউনিটের নেতৃত্ব প্রদানকারী পুলিশ কর্মকর্তা;

(৪২৯৩)

মূল্য : টাকা ৮.০০

- (গ) “ট্যুরিস্ট পুলিশ ইউনিট” বা “ইউনিট” অর্থ ২১ শ্রাবণ, ১৪২২ বঙ্গাব্দ মোতাবেক ৫ আগস্ট, ২০১৫ খ্রিষ্টাব্দ তারিখে জারীকৃত প্রজ্ঞাপন এস. আর. ও. নং ২৪৮-আইন/২০১৫ মূলে গঠিত পুলিশ বাহিনীর ট্যুরিস্ট পুলিশ ইউনিট;
- (ঘ) “ট্যুরিস্ট পুলিশ” অর্থ ইউনিটের কোনো পুলিশ সদস্য;
- (ঙ) “দর্শনীয় স্থান” অর্থ প্রত্নতাত্ত্বিক নিদর্শন, ধর্মীয় স্থাপনা, চিড়িয়াখানা, সাফারী পার্ক, ইকোপার্ক, স্মৃতিসৌধ বা স্মৃতিস্তম্ভ সংবলিত স্থাপনা, হেরিটেজ, বিনোদন পার্ক ও প্রাকৃতিক সৌন্দর্যমণ্ডিত স্থান;
- (চ) “পুলিশ আইন” অর্থ Police Act, 1861 (Act No. V of 1861);
- (ছ) “পুলিশ রেগুলেশন্স” অর্থ Police Regulations Bengal, 1943;
- (জ) “পর্যটক” অর্থ দর্শনার্থী বা এমন কোনো ব্যক্তি যিনি তাহার স্বাভাবিক বসবাসের স্থান হইতে অন্য কোনো নূতন স্থানে উপার্জনমূলক কর্মসংস্থানের উদ্দেশ্যে ব্যতীত পরিদর্শন, অবকাশযাপন, বিনোদন, ব্যবসায়িক প্রয়োজন বা অন্য যে কোনো কারণে গমন করিয়া অনধিক ১ (এক) বৎসর অবস্থান করেন;
- (ঝ) “পর্যটন সংশ্লিষ্ট স্থান বা স্থাপনা” অর্থ সেই সকল স্থান বা স্থাপনা, যেখানে দেশি-বিদেশি পর্যটকের সমাগম ঘটে;
- (ঞ) “পর্যটন সংশ্লিষ্ট অপরাধ” অর্থ পর্যটকদের দেহ বা সম্পত্তি সংশ্লিষ্ট কোনো ফৌজদারি অপরাধ; এবং
- (ট) “ফৌজদারি কার্যবিধি” অর্থ Code of Criminal Procedure, 1898 (Act No. V of 1898)।

(২) এই বিধিমালায় ব্যবহৃত যে সকল শব্দ বা অভিব্যক্তির সংজ্ঞা প্রদান করা হয় নাই সেই সকল শব্দ বা অভিব্যক্তি, ক্ষেত্রমত, পুলিশ আইন, ফৌজদারি কার্যবিধি, বাংলাদেশ পর্যটন সংরক্ষিত এলাকা ও বিশেষ পর্যটন অঞ্চল আইন, ২০১০ (২০১০ সনের ৩১ নং আইন) এবং পুলিশ রেগুলেশন্সে যে অর্থে ব্যবহৃত হইয়াছে, সেই অর্থে ব্যবহৃত হইবে।

৩। **আইন, ইত্যাদির প্রযোজ্যতা।**—এই বিধিমালায় সুনির্দিষ্টভাবে বর্ণিত হয় নাই, এইরূপ বিষয়ে বাংলাদেশ পুলিশের জন্য প্রযোজ্য ফৌজদারি কার্যবিধি, পুলিশ আইন ও তদধীন প্রণীত বা জারীকৃত বিধিমালা, প্রবিধানমালা, রেগুলেশন্স, আদেশ, নির্দেশনা, নীতিমালা, পরিপত্র, স্মারক এবং সরকার কর্তৃক, সময় সময়, জারীকৃত আদেশ, নির্দেশ এবং প্রজ্ঞাপন ইউনিটের ক্ষেত্রে প্রযোজ্য হইবে।

৪। **ইউনিটের কার্যালয়।**—(১) ইউনিটের প্রধান কার্যালয় ঢাকায় থাকিবে।

(২) ইউনিটের কার্যাবলি পরিচালনার সুবিধার্থে, সরকারের অনুমোদনক্রমে, দেশের যে কোনো স্থানে শাখা বা অঞ্চল কার্যালয় স্থাপন করা যাইবে।

৫। **ইউনিট পরিচালনা।**—(১) সরকারের নিয়ন্ত্রণে এবং মহাপুলিশ পরিদর্শকের তত্ত্বাবধানে, অনূন উপ-মহাপুলিশ পরিদর্শক পদমর্যাদার একজন পুলিশ কর্মকর্তার নেতৃত্বে, সরকার কর্তৃক নির্ধারিত সংখ্যক বিভিন্ন পদমর্যাদার পুলিশ সদস্য এবং অন্যান্য কর্মচারীর সমন্বয়ে, ইউনিটের কার্যক্রম পরিচালিত হইবে।

(২) ইউনিট প্রধান, ইউনিটের অধিক্ষেত্রে উহার কর্মপরিধিভুক্ত বিষয়ে, এই বিধিমালায় বর্ণিত কার্যাবলি সম্পাদন, ক্ষমতা প্রয়োগ ও দায়িত্ব পালন করিবেন।

৬। **অধিক্ষেত্র।**—ইউনিটের অধিক্ষেত্র হইবে নিম্নরূপ, যথা :—

- (ক) বাংলাদেশ পর্যটন সংরক্ষিত এলাকা ও বিশেষ পর্যটন অঞ্চল আইন, ২০১০ এর ধারা ৪ ও ৫ মোতাবেক সরকার কর্তৃক, সরকারি গেজেটে প্রজ্ঞাপন দ্বারা, ঘোষিত পর্যটন সংরক্ষিত এলাকা এবং বিশেষ পর্যটন অঞ্চল;
- (খ) দর্শনীয় স্থান এবং পর্যটন সংশ্লিষ্ট স্থান বা স্থাপনা; এবং
- (গ) এই বিধিমালার উদ্দেশ্য পূরণকল্পে সরকার কর্তৃক, সময় সময়, ঘোষিত বা নির্ধারিত যে কোনো অঞ্চল বা এলাকা।

৭। **ইউনিটের কার্যাবলি।**—ইউনিটের কার্যাবলি হইবে নিম্নরূপ, যথা :—

- (ক) পর্যটকদের নিরাপত্তা বিধানকল্পে প্রয়োজনীয় আইনানুগ ব্যবস্থা গ্রহণ;
- (খ) তদন্তের জন্য প্রাপ্ত মামলার দ্রুত, গ্রহণযোগ্য ও বস্তুনিষ্ঠ তদন্ত নিশ্চিতকরণ; এবং
- (গ) পর্যটকদের নিরাপত্তা বিধানের স্বার্থে অপরাধজনক ও গোয়েন্দা তথ্যাদি সংগ্রহ এবং পুলিশের সংশ্লিষ্ট অন্যান্য ইউনিটের সহিত উক্ত তথ্যাদি বিনিময়।

৮। **ট্যুরিস্ট পুলিশের দায়িত্ব, কর্তব্য ও ক্ষমতা।**—অধিক্ষেত্রের মধ্যে ট্যুরিস্ট পুলিশের দায়িত্ব, কর্তব্য ও ক্ষমতা হইবে নিম্নরূপ, যথা :—

- (ক) বিধি ৩ এ উল্লিখিত আইন, বিধি, প্রবিধান, রেগুলেশন্স, আদেশ, নির্দেশনা, নীতিমালা, পরিপত্র, স্মারক ও প্রজ্ঞাপন এবং উপযুক্ত কর্তৃপক্ষের আদেশ অনুযায়ী অর্পিত দায়িত্ব ও কর্তব্য পালন;

- (খ) ফৌজদারি কার্যবিধি অনুসারে গ্রেফতার, আটক, তল্লাশি ও জব্দের ক্ষমতাসহ তদন্ত সংশ্লিষ্ট ক্ষমতা প্রয়োগ;
- (গ) দর্শনীয় স্থান এবং পর্যটন সংশ্লিষ্ট স্থান বা স্থাপনায় পর্যটকদের নিরাপত্তা প্রদান;
- (ঘ) পর্যটকদের অবস্থান, চলাফেরা ও ভ্রমণ নির্বিঘ্ন রাখিয়া যে কোনো ফৌজদারি অপরাধ প্রতিরোধের লক্ষ্যে নিয়মিতভাবে টহল প্রদান করা এবং অপরাধীদের পর্যবেক্ষণে রাখা;
- (ঙ) পর্যটন সংশ্লিষ্ট অপরাধসমূহের তদন্ত;
- (চ) মোবাইল কোর্ট আইন, ২০০৯ (২০০৯ সনের ৫৯ নং আইন) এর অধীন মোবাইল কোর্ট পরিচালনায় প্রয়োজনীয় সহায়তা প্রদান;
- (ছ) সংঘটিত পর্যটন সংশ্লিষ্ট অ-আমলযোগ্য অপরাধ (non-cognizable offence) সংক্রান্ত বিষয়ে প্রচলিত আইন অনুযায়ী ব্যবস্থা গ্রহণ;
- (জ) দুর্যোগ বা দুর্ঘটনা মোকাবেলায় সংশ্লিষ্ট প্রতিষ্ঠানকে সহায়তা প্রদান;
- (ঝ) পর্যটন শিল্প ও পর্যটক সংক্রান্ত অগ্রিম গোয়েন্দা তথ্য সংগ্রহ এবং সংশ্লিষ্ট কর্তৃপক্ষকে উহা অবহিতকরণ;
- (ঞ) সংঘটিত পর্যটন সংক্রান্ত অপরাধসমূহের প্রকৃতি ও সংঘটনের পদ্ধতি বিশ্লেষণ এবং এতদসংক্রান্ত অপরাধ চিত্র (crime mapping) ও অপরাধীদের তালিকা প্রস্তুত;
- (ট) স্বাভাবিক জীবনযাত্রায় ব্যাঘাত সৃষ্টিকারী, নাশকতার কর্মপরিকল্পনা, ষড়যন্ত্র ও উদ্যোগ বা আয়োজন সম্পর্কিত আগাম তথ্য সংগ্রহ;
- (ঠ) বাংলাদেশ পর্যটন সংরক্ষিত এলাকা ও বিশেষ পর্যটন অঞ্চল আইন, ২০১০, বাংলাদেশ পর্যটন বোর্ড আইন, ২০১০ (২০১০ সনের ৩৭ নং আইন), বাংলাদেশ পরিবেশ সংরক্ষণ আইন, ১৯৯৫ (১৯৯৫ সনের ১ নং আইন) এবং প্রাকৃতিক পরিবেশ সুরক্ষা সম্পর্কিত অন্যান্য আইনসমূহ প্রতিপালনে সংশ্লিষ্ট কর্তৃপক্ষকে প্রয়োজনীয় সহায়তা প্রদান; এবং
- (ড) সরকার বা মহাপুলিশ পরিদর্শক কর্তৃক, সময় সময়, অর্পিত অন্যান্য দায়িত্ব পালন।

৯। **ইউনিট কর্তৃক মামলার তদন্তকার্য পরিচালনা, ইত্যাদি।—**(১) ট্যুরিস্ট পুলিশ ইউনিট উহার অধিক্ষেত্রে পর্যটন সংশ্লিষ্ট অপরাধ বিষয়ক মামলার তদন্তকার্য সম্পন্ন করিবে এবং নিম্নবর্ণিত পদ্ধতিতে উক্ত তদন্তকার্য পরিচালিত হইবে, যথা :—

- (ক) কোনো ঘটনা সংঘটনের সঙ্গে সঙ্গে সংশ্লিষ্ট থানায় মামলা রুজু হইবে এবং ইউনিট উক্ত মামলার তদন্ত করিবে;
- (খ) Crime scene management হইতে মামলা হস্তান্তর না হওয়া পর্যন্ত থানা পুলিশ বা ক্ষমতাপ্রাপ্ত অন্য কোনো পুলিশ ইউনিট ঘটনাস্থল সংরক্ষণ, প্রাথমিক তদন্ত ও আসামি গ্রেফতার করিবে;
- (গ) ইউনিট কোনো মামলার তদন্ত কার্যক্রম আরম্ভ করিলে মহাপুলিশ পরিদর্শকের লিখিত অনুমোদন ব্যতীত অন্য কোনো সংস্থায় উক্ত মামলা হস্তান্তর করা যাইবে না, তবে ট্যুরিস্ট পুলিশ ইউনিট, ক্রিমিনাল ইনভেস্টিগেশন ডিপার্টমেন্ট এবং পুলিশ ব্যুরো অব ইনভেস্টিগেশন কর্তৃক একই সময়ে কোনো মামলা তদন্তের বিষয় উত্থাপিত হইলে ক্রিমিনাল ইনভেস্টিগেশন ডিপার্টমেন্ট উক্ত মামলা তদন্ত করিবে; এবং
- (ঘ) পুলিশ কমিশনার বা, ক্ষেত্রমত, জেলা পুলিশ সুপারকে পর্যটন সংশ্লিষ্ট অপরাধের মামলা হস্তান্তর করিবার জন্য অনুরোধ করা হইলে অনতিবিলম্বে পুলিশ কমিশনার বা, ক্ষেত্রমত, জেলা পুলিশ সুপার, ট্যুরিস্ট পুলিশ ইউনিটের নিকট তদন্তের জন্য সংশ্লিষ্ট মামলা হস্তান্তর করিবেন।
- (২) পর্যটন সংশ্লিষ্ট অপরাধ ছাড়াও ট্যুরিস্ট পুলিশ ইউনিট আদালত, সরকার বা মহাপুলিশ পরিদর্শক কর্তৃক, সময় সময়, নির্দেশিত অপরাধের তদন্তকার্য পরিচালনা করিবে।
- (৩) এই বিধিমালার অধীন সুষ্ঠু তদন্তকার্য পরিচালনার প্রয়োজনে ট্যুরিস্ট পুলিশ সংশ্লিষ্ট ব্যক্তিকে জিজ্ঞাসাবাদ করিতে পারিবে।

১০। **গ্রেফতার, পলায়ন ও পুনরায় গ্রেফতার, সমন, ফ্রোক, তল্লাশি, ইত্যাদি।—**বিধি ৩ এবং ৮ এর সহিত সংগতিপূর্ণ হওয়া সাপেক্ষে গ্রেফতার, পলায়ন ও পুনরায় গ্রেফতার, সমন, ফ্রোক, তল্লাশি এবং তদন্ত সংক্রান্ত কার্যক্রমের ক্ষেত্রে ট্যুরিস্ট পুলিশ, ফৌজদারি কার্যবিধি বা, ক্ষেত্রমত, পুলিশ রেগুলেশন্সের সংশ্লিষ্ট বিধান অনুসরণ করিবে।

১১। **তদন্ত সম্পন্নের সময়সীমা।—**পর্যটন সংশ্লিষ্ট অপরাধ বা হস্তান্তরিত কোনো অপরাধের মামলার তদন্তের দায়িত্ব গ্রহণ করিবার পর তদন্তকারী কর্মকর্তা উক্ত অপরাধ সংশ্লিষ্ট আইনে নির্ধারিত সময়সীমার, যদি থাকে, মধ্যে তদন্তকার্য সম্পন্ন করিবেন।

১২। **ইউনিটের কার্যক্রমে পুলিশ কমিশনার বা জেলা পুলিশ সুপার এর দায়িত্ব।**—ইউনিটের কার্যক্রম পরিচালনার ক্ষেত্রে পুলিশ কমিশনার বা, ক্ষেত্রমত, জেলা পুলিশ সুপারের দায়িত্ব হইবে নিম্নরূপ, যথা :—

- (ক) অধিক্ষেত্রে পর্যটকদের নিরাপত্তা এবং সংশ্লিষ্ট মামলা তদন্তের প্রয়োজনে আসামি গ্রেফতার ও তল্লাশিসহ সংশ্লিষ্ট অন্যান্য কার্যক্রম পরিচালনায় ইউনিটের চাহিদা মোতাবেক জনবল, অস্ত্র-শস্ত্র এবং অন্যান্য লজিস্টিকস্‌সহ প্রয়োজনীয় সহযোগিতা প্রদান;
- (খ) আইন-শৃঙ্খলা সম্পর্কিত সভা বা অপরাধ পর্যালোচনা সংক্রান্ত সভায় ইউনিটের প্রতিনিধিকে অন্তর্ভুক্তকরণ; এবং
- (গ) তথ্য ও গোয়েন্দা তথ্য সংগ্রহে প্রয়োজনীয় সহযোগিতা প্রদান।

১৩। **পুলিশ বাহিনীর অন্যান্য ইউনিটের সহিত সমন্বয় সাধন।**—ট্যুরিস্ট পুলিশ ইউনিট—

- (ক) প্রশাসনিক, লজিস্টিকস্‌, তদন্তকার্য ও অপারেশন সংক্রান্ত বিষয়ে পুলিশ বাহিনীর অন্যান্য ইউনিটের সহিত সমন্বয় সাধন করিবে;
- (খ) পুলিশ বাহিনীর সংশ্লিষ্ট শাখা, বিভাগ, সংস্থা বা ইউনিটের সহায়তা গ্রহণ করিবে;
- (গ) তদন্ত সংক্রান্ত প্রশিক্ষণের বিষয় এবং প্রশিক্ষণ সংক্রান্ত কার্যাদি সম্পাদন ও পাঠ্যক্রম উন্নয়নে পুলিশ বাহিনীর সংশ্লিষ্ট শাখা, বিভাগ, সংস্থা বা ইউনিটের সহিত যোগাযোগ রক্ষা করিবে।

১৪। **লিগ্যাল সেল।**—ইউনিটের প্রধান কার্যালয়ে একটি লিগ্যাল সেল থাকিবে, যাহার কার্যক্রম হইবে নিম্নরূপ, যথা :—

- (ক) রিট পিটিশন, আইনগত নোটিশ, নারাজি দরখাস্ত, প্রশাসনিক ট্রাইব্যুনাল, রিভিউ, ডিম্যান্ড অব জাস্টিস নোটিশ, আদালত অবমাননা, ইত্যাদি বিষয়ে যথাযথ পদক্ষেপ গ্রহণ করা; এবং
- (খ) বিচার প্রক্রিয়ায় আইনানুগ লক্ষ্য অর্জনের জন্য, মামলার তদন্তের যে কোনো পর্যায়ে অথবা তদন্তকার্য সমাপ্ত হইবার পর বা বিচারকার্য শুরু হইবার পর, ক্ষেত্রমত, সংশ্লিষ্ট ব্যক্তি, সংস্থা, অফিস, সরকারি কৌসুলি, সলিসিটর, অ্যাটর্নি জেনারেলের অফিস, আদালত এবং প্রসিকিউশন উইং এর সহিত সার্বক্ষণিক যোগাযোগ রক্ষা এবং সমন্বয় সাধন করা।

১৫। **সাধারণ ডায়েরি, পরামর্শ বহি, পরিদর্শন বহি, ইত্যাদি সংরক্ষণ।**—ইউনিট, পুলিশ আইন, পুলিশ রেগুলেশন্স এবং বাংলাদেশ পুলিশ ফরম অনুযায়ী সাধারণ ডায়েরি, পরামর্শ বহি, পরিদর্শন বহিসহ সংশ্লিষ্ট অন্যান্য রেজিস্টার ও রেকর্ডপত্র সংরক্ষণ করিবে।

১৬। **হেফাজত**—এই বিধিমালা কার্যকর হইবার পূর্বে ট্যুরিস্ট পুলিশ ইউনিট কর্তৃক—

- (ক) কৃত বা সম্পাদিত সকল কার্যাদি, এই বিধিমালার সহিত অসামঞ্জস্যপূর্ণ না হওয়া সাপেক্ষে, এই বিধিমালার অধীন কৃত বা সম্পাদিত হইয়াছে বলিয়া গণ্য হইবে; এবং
- (খ) গৃহীত কোনো কার্য বা কার্যধারা অনিষ্পন্ন থাকিলে উক্ত কার্য বা কার্যধারা, এই বিধিমালার সহিত সামঞ্জস্যপূর্ণ হওয়া সাপেক্ষে, এই বিধিমালার অধীন নিষ্পন্ন হইবে।

মহাপুলিশ পরিদর্শক এর আদেশক্রমে

ড. মোহাম্মদ জাবেদ পাটোয়ারী, বিপিএম(বার)

ইন্সপেক্টর জেনারেল।